



松陵文獻

獻集卷十一

邑人潘樞章力田撰

長樂縣志
振興西
諸子書

人物志十一

高僧



宋

德一

德一吳江人建炎初為金人所擒遁歸卓墓村結草
菴以居暑月煮茗施行人人未之奇也既卒其徒法
才用火葬於烈燄中得其所持數珠人皆驚歎因名

其菴曰留珠元洪喬祖撰碑記趙孟頫爲書之至今尚存

元

善如 本續燈存藁

善如字愚仲吳江人嗣法徑山端禪師言不妄發信筆而書出世蘇州開元寺道望烜赫退居葑門直指菴人稱之曰直指和尚將終呼門人訣別泊然而逝

祖瑛 本續燈

祖瑛號石室吳江陳氏子出家於邑之普向寺得法

徑山晦機禪師任明州隆教雪竇育王及杭之萬壽晚年得痿痺疾造一龕曰木襪日坐其中不涉世事至正癸未三月見一衰衣婦人叩頭請師應身爲國王師曰吾不願生天王家逾十七日跌坐而化

原妙 本行狀

原妙號高峯吳江徐氏子母夢僧乘舟投宿而孕襁褓卽喜趺坐十五出家叅斷橋倫令究生從何來死從何去脅不至席口體俱忘叅雪巖欽令看趙州無字每入室輒被痛棒一日覩五祖演和尚真讚有省

自是當機不讓久之欽問日間浩浩時作得主麼曰作得主睡夢中作得主麼曰作得主復問正睡着時無夢無想無見無聞主在甚處師無語入龍鬚苦叅五載因同宿僧推枕墮地作聲廓然大徹咸淳甲戌遷武康雙髻學徒雲集遁入西天目之師子巖巖拔地千仞峭石林立就石洞營小室如舟榜曰死關悉屏給侍破甕爲鐺併日一食弟子亦罕得見道價彌重學者多殊方異域梯山航海而來師設三關語驗之下語不契輒閉門弗接元貞乙未冬鳴鼓告衆說

偈而逝塔全身於死關師行履孤高機峰險峻屹爲宗門砥柱其語錄盛行至今

明

弘道

本青島志

弘道號竺隱吳江沈氏子少穎悟日記千言出家青墩之密印寺從魯山文法師遊淹通教典謁我菴和尚於天竺溪得教觀權實之旨洪武初築室澄源溪上將終老焉尋奉旨箋註楞伽諸經頒行天下御製竺隱說賜之後與楚石琦同召入京爲僧錄司左善

世孝慈皇后崩岐陽王請作佛事於靈谷感神燈數
千照耀林木奉詔爲征南將士設廣薦大駕親臨有
靈光四燭祥雲冠山之應二十四年告老居長干坐
臥小室修一行三昧明年秋跣趺而逝茶毘舍利無
筭塔於天竺雙檜峰

古拙俊

本續燈

古拙俊禪師吳江人出家越州日鑄寺叅石屋珙及
三衢懶牧得禪定工夫叩古梅三見三被棒歸里立
限壁觀九年每二年燃一指歷燃三指忽大徹往見

福林度法戰相契遂畱首衆年二十八衆推出世遁
迹下山韜光巖壑三十餘年洪武間奉旨剃度千僧
任繁昌之東廬山永樂中被旨任金陵天界寺遂終
老焉

真正堂

以下三傳本同里先哲記及蒙菴藁

真正堂童稚辭親師事萬峰和尚慧性開明悟道甚
早精修苦行惟日不足草衣木食處之裕如嘗刺指
血寫經無疾端坐而化越三日徧體汗流茶毘復有
舍利時咸異之其弟應了然同師講道篤志禪那齒

德俱茂視其兄有光焉

寶南琛

寶南琛貌古心清充養有道始爲沙彌徒步登雙徑
禮愚菴禪師咨叩心要學成歸隱慧日懺院兼通儒
書遊戲詞翰士類極稱許之主定惠虎丘教席掌蘇
州僧綱規矩老成緇徒畏服姚少師廣孝與之淡契
未及領薦而終

壽無瑕

源古泉附

壽無瑕吳縣陳氏子乳哺不葷食年十二入洞庭西

山之福源寺師琅雪菴福源貲產甚厚雪菴卒無瑕
悉委不取惟孜孜訪道叅禪於萬峯之高弟持寶藏
受經於天界左善世誠鷲峰學通內外宣德四年領
薦住吳江報恩寺戒行卓然緇素向慕始有興復之
規嗣是掌教者爲源古泉本西山大族戴氏淹貫儒
釋闡揚宗旨名出無瑕之右正統六年嘗往長沙市
木舟行險途檣竿有火光燭天者三人歎其誠感後
五年建天王殿復產靈芝於是遠近尊信禪林改觀
矣

智瑄 見續燈

智瑄號寶峯本姓范氏父木匠也爲海舟慈禪師造塔院斧傷其足索酒飲之海舟曰傷足猶可設若去頭尚能飲否瑄聞有警遂求出家充火頭刻意參究不覺火燒去眉面如刀割引鏡自照豁然大悟作偈呈海舟被印可出世金陵高峯成化八年無疾而逝

真可 本塔銘

真可字達觀本姓沈氏其先自句容徙居吳江之灘缺生五歲不語有異僧過摩其頂曰此兒出家當爲

天人師言訖不見遂能語性雄毅貌偉不羣生不喜見婦人年十七仗劍將遠遊宿虎丘僧舍聞誦八十八佛名大喜晨解腰金設齋求剃度去而叅方聞僧誦張拙秀才偈大疑之頭面俱腫一日忽悟腫處頓消自是凌轍諸方過匡廬窮相宗奧義叅徧融於京師掩關淞江復嘉興楞嚴寺募刻藏經易梵本爲方冊天下便之徧遊五臺峩眉諸名山修復巨刹十五所所至緇素皈仰稱紫栢大師慈聖皇太后聞其名賜紫伽黎神宗皇帝遣中涓致問焉師勇於救護不

惜軀命嘗歎曰愍山遣戍不歸我出世一大負礦稅
不止我救世一大負傳燈未續我慧命一大負遂自
匡廬復入京師妖書事起誣奏及師逮下詔獄榜掠
狼藉猶與同繫者從容說法如平時一日索浴說偈
端坐而逝待命六日顏色不變還葬徑山肉身儼然
愍山作塔銘謂師見地直捷穩密不忝轉輪真子面
目嚴冷接人不用世情悲願利生弘護三寶是名應
身大士云有紫栢集十五卷行於世

性冲

本續燈

性冲字古湛秀水張氏子初以俗士見無趣空禪師
有所契遂棄家剃染尋受付囑結茅徑山開法吳江
之車溪菴提唱真切道風遠聞菴居二十餘載萬曆
庚戌應徑山祖庭之請疾作仍返車溪終焉

通問

本行狀

通問字箬菴父俞安期見文學傳安期晚年無子設
百日無遮大會而師生弱冠穎異能文偶閱楞嚴有
疑謁磬山修禪師矢志叅究將婚脫走武林落髮南
澗之理安寺叅密雲於金粟不契仍上磬山夜聞風

聲有省益加精研洞明宗要出世南澗移住夾山金山繼主磬山祖席復應嘉禾漏澤之請凡五坐道場說法如雷宗風大振乙未秋預知死期散衣裝圖書與檀護訣別泊舟吳江之應天寺沐浴更衣而逝師體甚羸弱而神觀精明條令嚴肅衲子多望崖而返惟真叅實究者依焉至今稱南澗門風清嚴孤冷諸方莫及自五燈會元後四百餘年無編纂者師乃徧搜諸宗師語錄舉要芟繁爲續燈存藁十二卷禪林服其精當

通賢

本塔銘

通賢字浮石平湖趙氏子生不茹葷將婚逃於普陀落髮焉歷叩真寂雲門懵無入路乃偕同志上鷹窠山頂掩死關聞舉屍在這裏其人何在有省得法天童悟和尚爲末後囑付弟子出世吳江遯村之報恩寺寺有三石佛自海上浮來其額曰古佛重光師俗名重光法號浮石如識記焉繼席天童歷應廣慧福城之請爲人樸實慈和與物無競學者樂親依之稱嗣法者最衆竟終老於遯村

道術

宋

陳昉

陳昉縣市人慶曆間為縣吏掌刑名以廉謹惠愛稱無妻子惟蓄一婢性嗜魚每食必以二魚為餉一日餉至而昉適他出同舍吏戲竊其一置舍蓆上昉歸以為婢所匿也怒責之時向暑舍蓆生蛆墜几上昉視之乃魚腐也始悟婢寃歎曰此小事尚然况吾為吏決大事能無寃耶遂辭役作詩

詩云二十餘年作吏人後園花木也

成林盡是筆頭那捩得枝枝葉葉有冤聲刑重惟恐囚人怨情輕又怕本官嗔不如無事早歸去免得生死冤對別親友從縣前運河洞中而去洞甚深相傳通太湖之底上聞浪聲行七十里可出洞庭山後數年有道人沽飲肆中將別畱一壺為贈曰以此償酒價貯酒當佳既去忽見酒旗上題云昔年陳昉登仙處酒味松陵第一家主人驚異取壺貯酒則香美異常自是沽者羣集家遂致富始知昉已仙矣因名其洞曰仙人洞洞上有橋曰仙里橋云明嘉靖間知縣張明道作亭其旁曰仙跡亭按真仙傳亦載昉事謂其

放魚得報於長橋踏白石上昇郡志因之益誕妄不足信

元

富恕

富恕字子微號林屋山人宋丞相弼裔孫南渡來吳幼習舉子業值元季兵亂遂棄家為昭靈觀道士然好學不倦善歌詩有名搢紳間嘗別築室雪灘之濱題曰掛簑亭又繪仙山訪隱圖一卷寄興雲海之上遂昌鄭元祐為記亟稱其人云同時有膺擇中瑛石

室皆吳江名僧恕與往還唱和爲方外交

雲外道者

雲外道者木真氏名靈保字佑之王逢梧溪集曰予過吳江同里洞真觀黃碧巖丹房會雲外道者曰嘗爲鎮南王長史統騎兵五百人征汝蔡妖黨以功聞賜金幣上尊陞司馬至正十六年二月長槍軍帥大小張鑑叛據揚州王退駐淮安時憲使褚不花拒寇趙負城胡陳寨首鼠兩間靈保說胡誘獲趙人畜千百計旣饑軍民相食數求老張平章援不爲應復將

王命間道走京師告危急狀授濟南路治中議督諸部救十月城陷不花拒敵死王被執逾月不屈妃某偕水死焉靈保得王凶問由海趨浙遂寄跡老氏蓋數年矣與之交旬日意氣殆欲相從於閩風之上者因壯其前高其後序而詩曰菲衣麻屨今道者元是親王右司馬雪尾羔羊蒸瓠肥金盤露酒明河瀉主畫才優彤邸間督戰功收霍丘下濟南別駕本遙授誓欲勤王膏草野先時張鑿叛揚州孤軍退在籌邊樓老張平章擁精銳間道蠟書躬遠投近郊雖順等

狼子千里橫亘長淮鱗鵠形徒志牛後燕龍種竟逐
鷗夷浮申胥血淚霽雲鏃落景荒寒影悽獨去燕留
吳百朮胸蘇臺又復遊麋鹿三萬頃湖七十峰一筇
一篷娛老足胎禽將雛桐白華遇我黃石仙翁家蔬
珠真經口暗誦滿月澹暈天東霞來者玩迅電往者
歎逝水擬招安期生更拉偓佺子閩風共揖長爪姑
試問蓬萊清淺還有幾

明

胡道安

胡道安字安谷性狂戇人呼胡風子爲玄妙觀道士
師計玄老晚遇異人授青城太乙雷書及斬勘魃魔
秘旨洪武末吳中秋早知府延道安致禱道安登壇
醉酒詬罵怒髮衝冠令下陰雲四合雷雨大作知府
甚敬禮之

楊茂林

楊茂林字湛然有道行不用符檄書片紙能役神鬼
永樂五年文皇后崩大集黃冠修醮事資冥福茂林
以白衣見上異之命以官不受賜法衣俾遊四方會

松陽文獻 卷十一
吳江大旱署縣事王懋本延之禱雨雨隨澍因畱之
崇真道院構方丈以居在院屢著靈異一日忽蛻裘
履而逝蓋百餘歲云後有自洞庭還者遇茂林授以
二履令攜歸人始知其僊去

鄧青陽

以下二人本同里先哲記

鄧青陽全真道士也金丹內煉之功既成雲遊物外
自武當往武夷因過同里隱者范伯彰延之家塾聽
講神清氣肅見者竦然嘗著觀物吟百篇皆託物以
喻性理之旨後數年尸解而去

俞嗣宗

俞嗣宗字廷遠儀表修長音吐洪暢傳靈寶齋法默
契其妙醮筵歲事終日無惰容其誠敬類如此久居
仁濟道院闔郡知名年九十有六

一會...
 吳...
 前...
 亦...

藝能

明

馬孜

馬孜字彥強善書洪武中嘗受薦不仕

盛寅

弟宏子僎從子倫

盛寅字啓東以字行逮之子少學於王山人賓察脉
 處方有奇效永樂間有內侍以蠱斥居外久之上望
 見驚曰而固在耶對以寅實生之得召見授御醫太
 子妃孕而疾動寅謂當與利藥諸醫皆駭阻妃聞令

言利藥者進治立愈大被賞寅在上前持論梗梗以此愈重之扈從北征洪熙初掌太醫院賜勅褒美宣德中嘗應制賦瑞雪詩一日與同官奕於御藥房上猝至不及屏因叩頭請罪上覽局咨賞令賦觀奕詩明日御製醉太平詞以賜其家至今傳之寅節操不苟嘗夢有寄胡椒者私啓之覺而踈踏遂至累日巡撫周忱與道故舊餉餘糧米百斛寅以詩却之忱服其高致臨卒作詩三章年六十七所著有流光集弟宏子僎從子倫俱以醫顯故盛氏世世隸太醫籍云

先賢讚有命啓東視黑白猿疾事類戲媒不根且他書不載故削之

宏字叔大亦爲御醫與寅齊名景泰初治宮妃疾良效當進官不拜以家世隸軍伍請除之報可尋致仕僎字汝德勤學有行誼寅教之曰醫貴有德顯則出入禁密微亦往來閨闈不可不慎也僎謹受命父卒醫遂大顯不以貧富二其心教弟佺成進士嘗使家僮輸糧於官多取一籌以歸僎怒責之置米屋後以飼鳥雀其立志如此從子皚徐志作字用美早年應舉不偶遂更業醫精其術存心仁厚士大夫皆禮重

之成化初召入太醫院將擢用以母老告歸久之自
撰墓誌而卒年七十五子乾亦善爲方有父風
倫字文敘性明敏少傳寅學又遇異人授堪輿家言
尤精其術人以疾求療及相地者殆無虛日

盛伯瑄

以下三人出同里先哲記及歸田藁

盛伯瑄其先揚州人隨父宦遊華亭會中原道梗徙
居同里性耿介寡與勤於問學爲詩務出己意不喜
與人賡酬善以子平之術推人貴賤貧富壽夭累著
奇驗安貧樂道壽終於家獨行之士也二子謫戍南

荒以歿遂無後

麋仲康

麋仲康於醫甚深內經諸書唐宋以來名家之所論
辨皆能鉤摘幽隱切脉治病有十全之效然不汲汲
於利故鄉人尤德之子宗伯能詩章善墨梅醫術益
顯

周孟堅

周孟堅世以醫名同里迨孟堅尤精其術所試輒效
知縣王廸雅重其爲人名其堂曰恒心成化中入太

松陵文獻 卷十一
醫院後歸自京師聲譽益振人有求者隨扣輒應不以終始易節縉紳皆折節下之同時又有蔣士能善瘍醫亦世業也

陸復

陸復字明本善畫梅自號梅花主人嘗至金陵用黃紙題門自鬻魏國公出見之訝其僭妄執之復謝曰愚民不識禁忌因問何能對曰能寫梅耳命畫於粉壁高數仞復染翰操管頃刻而成公大喜賞之更加禮焉由是名重兩京

鄒明

鄒明字啓東善傳真得意時絲髮無不肖者

沈與齡

沈與齡明醫不爲危言高論而所治十不失二三遠近神之稱爲竹亭先生有醫便行世

周叔宗

周叔宗名祖以字行用之孫好禪理工真草書自言得晉人法有高韻嘗至京師名大噪時人求其泥金書者一字一金同時有顧澄先者字慧曉工歐陽書

體嘗放叔宗筆意往往酷肖而氣骨不如識者以此別其真贋

張金

張金字德純以字行居梅里有花木之勝以畫猫自給人或買縣堂中真猫見而怒與之鬪名遂重知縣劉時俊高其行嘗屏騶從造其門短几山肴相對移晷

皇甫焯

皇甫焯字文含叅政渙孫博學能文旁究六壬遁甲

之術崇禎十年以明經對策京師有試其術者扣以日中休咎焯占之曰今日主馬驚其人哂曰吾此馬服之二十年騁高凌阻如履康莊何至罟駕爲哉將歸謂馭者曰善控之毋爲皇甫先生笑也行未二里馬遇橐駝駭而奔其人僅免心服焯之奇中自此知名京師

黃宸

黃宸自稱長嘯生善山水花鳥兼長八分書性嶽嶽不喜附麗有隱者風從子鳴鳳亦善寫生

松陵文獻 卷十二
潘子曰余聞之自嘉隆以來縉紳先生風流弘長類
多兼能如周公用顧公大典竝擅丹青而曹公鏌薛
公穆爲之亞王公問汝公泰竝工書法而朱公應辰
凌公信爲之繼以至吳公涵善篆沈公璟善四聲珣
善隸此數君子者文章政事表表耳目皆不以一藝
名故無得而贊焉然亦足見一時文雅之盛云

松陵文獻 獻集卷十二

邑人潘樾章力田撰

人物志十二

列女

宋

張二娘

張二娘湖州人嫁邑民陳熙載年二十而寡

徐志云二十三

父母憐其無子欲奪之不從以夫從子煥文爲後事
舅姑無失禮年八十餘元大德二年旌其門

元 蘇無火 蘇氏八十餘元大德二年其門
獨吉氏 其無子 蘇氏志不娶 以夫無子 又無子 故

獨吉氏 斷事甯六舍妻也 夫亡守節不嫁 至順二年
被旌

明

阮妙瞻

阮妙瞻 郡人 時卿女 嫁劉彥敬 年二十五而寡 子真
裁五歲 且姑已老 妙瞻竭力奉養 訓子讀書 仕至河
間府通判 鄉人榮之 洪武十年旌表

楊六娘

楊六娘 查華二妻也 年十七而嫁 有娠未產而夫卒
及生子名勝 十躬自教育 以承宗祀 洪武十九年旌
表

按實錄 洪武二十年夏四月 吳江民劉某妻阮氏

查某妻楊氏 皆年少夫亡 不改其節 詔旌表其門

據此則二婦同在二十年旌表 而舊志一以為十

年一以為十九年 未知孰是 姑從原文

錢氏

錢氏太倉人嫁同里胡原洪武三十年原戍雲南逃
還事覺坐棄市錢曰君萬里歸爲妾耳今君死妾何
忍獨生至夜分抱乳下兒泣曰吾不能保汝矣遂自
縊年二十八袁華爲傳夫才不如其體節盡其門
陸氏官難北苑二十平夏四民吳武月繼其妻武月
陸氏吳江民王永年妻年少喪夫育孤有方守節無
玷正統七年三月旌其門見英宗實錄莫徐二志皆
不載

凌淑貞

凌淑貞太常少卿信之女兒也歸同邑范忠忠早死
淑貞守節不渝天順五年三月旌其門

張福真

張福真湖墓邨小家女也嫁黃偉偉父茂故爲許氏
奴居城西賣漿偉死茂貧且鰥福真度難與居遂歸
父母家父母強之他適自知不免佯許諾擇日當行
乃粧飾衣常服密自經死時弘治五年十一月十六
日也年二十五知縣金洪聞之欲爲奏聞而里老懼
爲累不以實報遂止

事見莫日續志較徐志所書頗為詳覈蓋福真實以舅家貧且鰥無所依故不得已而歸父母家志不見諒遂以死繼之耳而徐志云茂將嫁之又云沐浴更衣辭其舅姑而出不知奪其志者乃父母非茂也而茂已鰥居又安得所謂姑而辭之紀載失實如此不可不辯

王氏

王氏少孤事大父繼宗盡孝贅趙維為壻年二十而維死繼宗欲更嫁之不從携二女以居躬紡績以養

大父如是者三十餘年有司以聞弘治十二年旌其門

沈氏

沈氏知縣愚女弟也歸吳嵩嵩溺死無嗣竟不他適正德十三年被旌

顧氏

顧氏歸龐榮榮病瘵十年而卒顧哭之哀遂至失明父寬家故豐欲迎養之不從曰兒雖大人遺體然有家在不可留也事姑能盡孝鄉里稱之正德十六年

旌其門見實錄徐志云嘉靖三年誤也

陸潔

陸潔許謨妻也年十八而嫁二十謨亡潔卽斷髮破面示不二志奉老姑撫稚子人無間言嘉靖十一年旌表卒年八十八

錢如潔

附沈氏

本杜偉墓誌

錢如潔父皓世爲儒林里著姓少字按察僉事曹鏐長子糖糖有癩疾不能娶自願解盟皓不聽鏐乃先娶小家沈氏女與糖居以試之糖終不知人道於是

又申前請皓從之如潔微聞卽欲自經母防守不得死稱病不食母強之如潔曰獨不聞蔡人之妻宋人之女故事乎母以爲然乃始食常晏居淡念偶見侍者棄敝衣於地呵之曰衣敝也而棄之假令而夫病也亦將棄之乎父母知其意防守益密而潛以女更許烏程溫氏如潔聞之復不食母慰諭三晝夜乃稍蔬食自度求死不得乃佯爲歡笑如平時守者稍懈將行之夕沐浴更衣大書寢壁遂東向自經死以曹氏所居近東也時年二十六後二年糖卒沈氏年尚

少姑董氏憐欲嫁之沈氏泣曰錢母未歸也猶能捐生以殉而妾旣歸矣又誰歸哉自是屏居一室足不踰閩嘉靖四十五年巡按御史溫如璋以沈氏貞節聞詔表其門獨不及如潔以世宗年高方祈天永命諱言死故遺之也沈氏謂錢母正適未蒙旌典讓不敢先至萬曆二年乃卒年八十有五嗣子大武請於錢氏迎如潔柩以歸遂合葬焉邑人稱曰雙烈

徐志書雙烈事多未覈今以吳中往哲記及墓誌叅定之徐志云禧卒溫氏來迎女知不免乃屏人

闔戶沐浴更衣書於寢壁云前緣已定禍福同當遂自經死遺書與其姑董求葬曹氏墓從之按錢女之卒在正德癸酉禧卒在後二年乙亥而謂禧卒於溫氏來迎之前不知曹氏已解盟矣固不必待其卒而始議他適也書壁之詞凡十四字卽居恒自念只有一船搖兩櫓何曾一女嫁雙夫兩語耳徐志云云不知何據至於合葬之事成於萬曆甲戌嗣子大武之謀距錢氏之卒已六十餘年而謂女自請之其姑從之不亦疎乎噫卽此一事已

不勝牴牾可見史事之難即讀史者亦未易也

黃氏

黃氏凌士奎妻士奎沒黃氏年僅二十一有遺腹孤曰安親鞠之以至成立守節終身

費氏

費氏父庸年十八適郁瓚期年瓚卒無子矢心守節剪髮自誓已而脫簪珥營葬具因為壽藏以俟曰我未亡人也孀居三十五載人無間言嘉靖三十八年旌表

沈氏

本周道登撰傳

沈氏憲副啓曾孫女也年十八歸王子遠未踰歲子遠卒無嗣家貧依母以居沈氏哭曰所以不即從王生地下者欲求一胤子以繼烝嘗倘四十無後是天也吾竟下殉王生矣已而子遠弟孔章舉子洪祉沈氏適四十遂以為子遠後子遠屬纊時以短幅作書遺甥疑之沈氏得而帛囊之以自佩曰此王生書也覽之輒泣下垂四十年而以帛囊泣授洪祉曰此爾父書也平生足不踰閩言不出閩巡按饒公以其節

聞於朝加旌異焉

沈氏

沈氏諸生周甸妻夫早亡守志不貳萬曆三十年旌表

姜氏

姜氏姜誠之女年十九適吳會會故非溪舊族遷長洲之葑溪善丹青姜氏歸會僅半載而會與其父及大父母相繼染疫死姜氏奉姑朱氏誓以死守家貧甚日勤紡績以供饘粥先是會娶婦時曾貸其友白

金三兩會歿友欲取償因說其姑令姜氏改適姑猶豫未決姜氏遂慨然入內寢自經死後事聞表門建祠詳見長洲志

凌貞女

本朱陞宣撰傳

凌貞女同里人字里中徐生應化未娶而天貞女聞之泣請於父母欲往臨其喪不許則撫膺曰兒徐婦也父母禁兒行將何以爲兒有死而已父母不得已強聽一往貞女往卽易衰絰伏尸哭極哀水漿不入口者數日保姆乘間趣貞女歸貞女曰此吾家也又

安歸耶是時徐氏內外無不驚異貞女然以其年方少不欲畱之而貞女則堅欲畱誓不復去久之其舅死姑獨與貞女居又不能給薪蔬貞女益務操作以供養姑歲大禋斗米至二百錢而貞女以其力作所得更市美好以進姑爲感泣姑嘗疾困貞女剝股肉以啖之姑失明貞女屢舐其目已遂豁然人以其孝感嘗立從子爲嗣竟不祿及姑卒并舉其舅與應化之喪皆貞女以一身任之自童年歸徐以迄於老飲食臥起必依徐郎柩哀感閭里巡按御史以其狀聞詔旌其門歲給粟帛終身

沈氏

本陳宗之傳畧

沈氏吳江人從父徙吳適黃居堂家壁立工丹青年二十四居堂死歛畢卽投繯居堂兄覺之泣曰弟無後而有遺孕倘生男弟不死矣沈氏拭淚從之屏處一室椎髻垢面日勤刺繡或臨夫畫冊粥斗粟自給後果生子元吉稍長卽課之讀篝燈緝績每隆冬單衣膚肉皴瘃至夜分欲寐引針自刺其臂年餘五十父患瞽無子獨棲臯峰山沈氏曰非我奉養不能全

父餘年矣乃歸父茅舍親刈草舂米以供朝夕崇禎十年提學御史疏其節孝詔旌表

何氏

何氏邑民湯敏妻守節四十七年崇禎十年巡按御史以聞詔旌表

周氏

周氏四都人父早卒育於伯父諸生行簡年十二字邑人顧士彥未及婚而士彥患蠱奉侍湯藥者四年士彥竟卒周氏事翁姑以孝謹聞翁姑憐其年少謀

令更適周氏覺之乃剪髮毀容以絕其意萬曆三十九年知縣魏士前高其節爲加笄表門後翁姑沒含歛如禮尋卽所居以葬顧其地接吳氏祠堂所以誘脅改葬者萬端周氏不得已乃聽遷而身依族子以老年七十餘乃卒論者謂周氏固女也而全乎其爲婦且全乎其爲子養生送死始終一節嗚呼難矣潘子曰傳列女者所以愧夫男子而二其行者也然而苦節幽光考見爲難莫志所載非旌表者不與近於隘矣且旌表者類有力者得之匹婦慕義將何所

勸焉徐志蒐採加詳然亦不數數見也以余所睹記
往往家傳伯姬之操人表少君之行雖未能盡書然
是足以風矣至於乙酉以後海宇版蕩士大夫往往
偷生蒙面而紅女田姬乃能駢頸連臂視死如歸一
邑之中後先相望何其盛也余友戴笠業已彙錄爲
一書而余采其尤者綴於篇

張氏

附張氏程氏

張氏諸生沈承銘妻乙酉十月十三日賊至盛澤被
執張氏自紉其衣賊欲解之以刃自刎死同日遇害

者有張敬宇女盛澤人也字於邵賊焚其家挾女出
女奪刀自刎其面賊怒殺之又有徽州民程振華女
寓盛澤賊欲污之不從赴火死

顧氏

顧氏諸生顧而雅女同里人歸於陳乙酉八月二十
一日賊至殺其夫復逼之且哭且罵見殺於野

許氏徐氏顧氏沈氏

許氏太學生馬孟翔妻徐氏民徐華宇女顧氏民顧
玉洲孫女年十五皆同里人也賊至俱赴水死又同

里諸生沈襲嘗女爲賊所獲斷臂而死

張氏 附邵七妻

張氏許墅關人吳江諸生陳偉妻丙戌正月十五日吳勝兆兵入城被執給守者投寶帶橋下死後月餘求得葬之貌如生邑中人士多爲詩文以弔焉同時有邵七妻居西門外被掠至寶帶橋亦赴水死

張氏

張氏諸生顧應鼎妾賊逼汚之哭詈不屈遂要斬焉

顧詵妻 附陳氏吳氏

諸生顧詵妻某氏遇賊不辱赴河死又有陳氏者諸生陳若來女年十七賊至投水賊救起氣未絕少選復投水死吳氏者亦儒家女遇賊赴河挽之出卽抱樹不可解被殺

徐氏 附翁妻

徐氏與夫程某同避賊夫以金數兩授徐氏獨前遇賊見殺徐氏曰夫若懷金可以免死我何忍獨生亦赴水死時有翁某妻舟行遇賊先殺其夫將汚之妻曰殺吾夫卽吾讐也奮罵不已遂被殺

沈氏 附邵一妻

沈氏諸生陳啓瀛妻貌美而賢事翁姑以孝聞乙酉七月兵入同里啓瀛以全髮梟於市沈氏偕子女匿竹林中兵搜得攜其子女去復欲執沈氏沈氏倚竹誓死不肯去兵怒斫其臂遂仆地死而一手猶握竹節堅不可脫人咸異之邵一妻某氏貌頗美被執至舟中怡然如常兵不爲備至寶帶橋投水死

陳五媳

民陳五媳某氏黃家溪西木橋人年二十賊害其夫

因逼之某氏僞許焉挾以登舟伺間跳水死

徽商二婦

徽商某妻妾二人避難吳江洋雅港遇賊妻自溺死妾被獲不從痛罵受三刃而絕

徐氏

徐氏盛澤沈仲衡妻乙酉兵至匿屋壁中火發出投社廟一卒露刃脅之抱柱不行強牽以去經白漾自投於水卒復出之驅令登舟大罵觸石卒怒刃之被七創而死

補遺

顧氏

顧氏光祿監事綱之女歸吳邦棻僅歲餘邦棻卒業太學病沒顧年二十四誓不改適事孀姑以孝聞嘉靖四十年旌表

寓賢

志有寓賢蓋人物之別見者也邑當吳越之衝素擅江湖之勝故停車問津者往往而有然或游而非寓則例不得書或寓而非賢又不必書也徐志列陸龜蒙范成大於寓賢中余旣據史傳駁正之矣若黃由姚廣孝皆以同郡之人名之曰寓夫壤地相接過從往來何所不有若必一一借書繁複已甚且余作是書雖托始一邑將藉爲三吳之權輿若彼此互用亦何用此駢枝爲耶故謹而削之非敢略也

宋

方滋

方滋字務德少寓應天寺建炎間歷浙西提舉司幹
官乾道中知紹興平江二府

元

楊維禎

楊維禎字廉夫會稽人泰定中舉進士官至待制至
正中避兵華嚴寺尋徙松江築玄圃蓬臺海內文士
造門納屣殆無虛日自號鐵崖既得鐵笛號鐵笛道

人洪武三年召修禮樂書維禎賦老客婦詞以進上
喻其意賜安車詣闕畱百餘日書畢卽乞骸骨命仍
以安車送之抵家而卒年七十五維禎天才逸邁所
著詩文爲學者所宗號曰鐵體邑人陶振謝常輩皆
其門生云

錢惟善

錢惟善字思復錢塘人至正辛巳鄉試出羅剎江賦
鎖院三千人皆不知錢塘江爲曲江維善据枚乘七
發引用因此得名遂號曲江居士官至副提舉張氏

據吳遂不仕退居吳江同里與楊維禎倡和有句云
笠澤水寒魚尾赤洞庭霜落樹頭紅又云漢史丁公
那及齒陶詩甲子不書年蓋感時事也已而移居華
亭洪武初卒與維禎及陸居仁同葬干山號三高士
墓

倪瓚

倪瓚字元鎮無錫人詩畫清絕爲世所重至正間避
兵邑中寓同里及華嚴寺士大夫爭延致之見俗子
輒避去不顧張昶人物志云瓚元季鬻田百千緡悉

與張伯雨晚年扁舟江湖多依止僧房道館寓松陵
與陸靜遠虞勝伯爲友靜遠子願其子壻也時崑山
顧瑛亦棄家隱同里僧寺故江陰王逢懷瑛詩有九
里水雲孤櫂泊半樓霜月兩尊同之語

明

丁敏

丁敏字異學本烏程人詩文典雅元末徙居吳山之
麓與里人袁黻張壽輩相唱和繞屋皆植梅常笑傲
其下有詩集傳焉

董遠字仁仲天台人少以遠大自期不事家人生產
精朱氏詩兼通左氏春秋至正中兩試有司不中遂
畱錢塘潛心古學不復以科舉爲意已而入吳止天
平山復寓松陵之梅花莊張士誠聞遠名遣使奉書
幣迎之遠受書返幣堅臥不起使及門者再乃避地
錦峰依浮圖氏以居吳元年徵赴京師以沉嘿不稱
旨謫居濠梁八年以薦授莆田知縣時年六十餘矣
其治莆田以循良稱後卒於吳

王禕

王禕字子充義烏人元季覩時政衰敝走燕都上書
不報歸隱青岩山中太祖徵爲中書省掾進平江西
頌上喜曰浙東有二儒卿與宋濂學問之博卿不如
濂才思之雄濂不如卿詔修元史與濂同爲總裁官
書成拜翰林待制奉使招吐蕃至蘭州召還改使雲
南抗節死事具國史建文元年贈翰林學士謚文節
正統中改謚忠文禕與陳基善嘗同遊吳松寓居頗
久集中有吳江客中冬至日及吳江別蓮上人詩蓋

皆未遇時作也

李幹

李幹字貞臣睢州人仕元爲許州同知歷戶部侍郎
佐擴廓軍後敗明兵俘置鎮江已而選入司農議禮
律官制皆預焉及建六部以爲吏部郎中兼秦府相
叅軍召議藩封復斥居寧夏又召入爲翰林待詔直
閣以老致仕來蘇依友人盛逮居一都年八十六卒
逮爲買地黃山葬之幹通究典章明國初制作論議
英爽一時稱之

張明善

見同里先哲記

張明善博學多才長於詞曲古樂府歌行頃刻數百
言立就得騷人比興之體善推步天象言休咎有徵
元至正間從湖廣客遊東吳道阻不能歸因僑居同
里巨室爭延致之方賓筵酒酣操筆爲新詞擊唾壺
而歌聞者爲之傾倒清癯多疾遂卒

松陵文獻

獻集卷十三

官師志一

邑人潘樾章力田撰

潘子曰吳江置縣起於五代自是以前吏治民俗邈不可考矣然故老所傳如吳盛斌之作土田五代司馬福之捍牧圉雖其人皆韎韐者流然生而有功於民死而廟食其地尚論者有餘思焉宋世縣治草創地利未闢生齒亦稀賴當宁者留意是邦往往妙選京朝之吏以煦妪而生息之循卓之蹟於斯爲盛元

政不綱一羊二牧率皆苟且之治然亦有一二善者不可沒也明興縣在畿赤之間號爲衝煩故常擇高第有才力者任之或以治行茂異遞遷茲邑三百年間無曠土無游士無流民非官師得人惡睹斯效哉下至簿尉之冗司驛之微亦時有卓然能自樹立者官無崇卑顧於民何如耳嗚呼一邑之治亂可以觀天下之盛衰焉可不慎哉

吳

盛斌

盛斌赤烏中爲司馬奉詔與上大夫倪讓將軍徐傑分畫地界建渭作田邑築塞自青草灘至野和溪而斌之功居多及卒邑人葬之至今呼其地曰盛墩且立廟祀焉

五代

司馬福

司馬福郡人始隸吳越王水軍爲游奕都虞候梁開平三年淮人圍蘇置柵環城內外阻絕王遣兵來援莫知城中音問以福能潛行水中遣入城淮人設網

縣銅鈴織鱗過者必覺福以巨竹觸網淮人聞鈴聲
亟舉網網舉遂得渡或浮水上則戴萍苻而行旣入
復出凡在水中者三日及援兵與城中弓矢相應淮
人以為神時吳江始置縣以福為都指揮使築南北
二城遂命守之卒於官福美須髯屢為謀者入城因
剪其須淮人竟不能識

宋

趙球

趙球開封人畜書萬卷祥符中秘藏火四庫書皆盡

球上其家書授三班借職天聖中用薦知吳江縣武
弁為邑自球始嘗修築松江亭仕至右侍禁

馬尋

馬尋字子正鄆州人祥符初進士主吳江簿兄彛戒
之曰到任半載可誦律書為治民之本後彛至詰之
尋曰治在孔道疲於送迎未暇及也彛不懌尋曰少
徐之至冬果精律學繼登朝籍久參法寺有平允之
譽累著治聲彛之力也

李問

公慶文狀

卷十三

三

李問慶曆三年以大理丞知吳汀七年與尉王庭堅
議建廟學勸民出緡錢數百萬會詔郡縣不得新立
學遂謀移其財以建長橋初縣城爲江流所判民半
居江南半居江北非舟莫濟且有風濤之險乃相形
勢建橋橫截江中長二百餘丈用木萬計浮議四起
不爲動卒底成功後世賴之其他塘路橋梁無不修
舉美政甚多今列名宦祠

王庭堅

王庭堅字世美爲政平允與李問創建長橋晉陵錢

公輔爲記稱其精敏沉毅云

郡志載王尉而不及李令於義無取今採莫志原
文以長橋之役歸功於令重首事也

張先

張先字子野康定初進士知吳江有惠政詩格清麗
尤長於樂府仕至都官郎中晚歲優游鄉里嘗泛扁
舟垂釣至今號其處張釣魚灣年八十九卒有文集

樂府

裴煜

裴煜字如晦嘉祐六年知吳江歐陽修梅堯臣王安
石皆作詩送之

孫覺 本正史叅郡志

孫覺字莘老高郵人舉進士熙寧中知湖州以吳江
水患命治之江橋延袤二百餘丈覺募民修築勢愈
雄壯又湖塘兩岸嘗責民以竹篠捍禦率數年一修
易敗或致潰決覺復市石增築遂得支久岸旁皆爲
良田覺材幹通敏事集而人不知勞嘗葺如歸垂虹
兩亭詮次邑中畱題百餘篇爲松江詩集歷右司諫

知蘇州終於御史中丞

按宋史本傳無吳江事惟云熙寧中出知湖州松
江隄沒水爲民患覺易以石高丈餘長百里隄下
化爲良田則覺之修江橋築湖塘皆此時事蓋吳
江嘗屬湖州故也郡志因修隄事遂謂治平三年
以民曹掾權知吳江官爵年月錯亂甚矣但覺功
德在人例得附書名宦故存之

郡志云陳瓘字瑩中沙縣人元豐中進士政和元
年再被謫主吳江簿未幾卒贈諫議大夫謚忠肅

王志堅云宋史本傳甚詳然不言謫吳江簿固已疑之余攷瑩中年譜政和元年方安置通州旋以上尊堯集徙台州宰相徧令所過州出兵甲護送將脅以死安得有主吳江簿之事耶况瑩中卒於宣和六年距政和改元且十有四載而云元年謫吳江未幾卒何居然則郡志所繇傳譌必因瑩中詩有三年為吏此江濱之句耳今考此詩出見聞搜玉又有載王禹偁作者題曰再過松江蓋禹偁嘗令長洲松江實在其境則此詩為禹偁作無疑

也今改松江為松陵又以再過為再謫影響附會失之愈遠又非孫中丞之有蹟於吾邑者比也故削不載

林肇

林肇字公權

莫云吳興人

寶元中進士熙寧三年以尚書

屯田員外郎自請知吳江始至覽江湖之勝緬懷古人慨然有歸與之興乃即松江勝處作鱸鄉亭繪三高像其中既落成遂具舟由亭下拂衣而歸

程端

程端元祐二年知吳江改建廟學有惠政

向子韶

向子韶字和卿開封人元符三年進士為保州司法

叅軍僉書荆南節度判官秩滿知吳江郡人私鑄黃

錢流布一路知州聽民自便

徐志改為知府按此時郡尚為州不當作府也

子韶以為不可騰書極言其害下令禁之一縣無敢

犯者已而中司論其事詔治故縱之吏諸縣皆曰太

守命也吳江令嘗力爭書具在子韶聞制使來謂當

被逮即具舟束裝以俟吏及門即行初知州意子韶

必引前言自解子韶至卒無一語獄成自知州以下

皆貶秩子韶獨進一官其後知州孫傑召屬縣議欲

一大保置一鼓樓保丁五人以備巡警盜發則鳴鼓

以聞子韶曰一大保二十五家而已如吳江外鎮有

合境不過五里者無慮數百家若二十五家置一樓

則不可勝計矣又以數十人持挺更巡其間有强悍

不逞者遞相侵陵則鬪爭自茲始不可為也知州必

欲行之子韶固爭逾月不能決同列謂子韶曰不若

稟令而歸至縣則措置在我子韶曰稟令而不行則

有司得以慢令罪我矣久之卒如其言大觀三年除
開封府右叅軍靖康中知淮寧府與金人巷戰舉家
被害贈通議大夫謚忠毅今列名宦

曾懋 字懋信 文以幾十人將於夏漢其間有

曾懋字叔夏贛州人崇寧間主吳江簿仕至禮部尚
書孫樞淳熙六年復繼先職見黃澣曾程堂詩序

程俱 字少章 嘉興人

程俱字致道信安人 王志堅人物志云衢州開化人 元符中以外祖

鄧潤甫廕補吳江簿政平訟理有循良之風優於文

學作松江二賦三高祠詩序遠近傳誦之累官中書

舍人政和間自監舒州茶場上書論時政不合來家

於吳城北葺小屋號蝸廬其後主簿高文虎以曾懋

及俱皆為此官作曾程堂以寓景仰范成大為之記

文虎字炳如登紹興進士調吳江簿博通典故寧宗

朝為中書舍人兼直學士院國子祭酒以力攻道學

為世所譏

徐勣 字勣 齊州人

徐勣字元功宣城南陵人舉進士調吳江尉初與何

執中偕事徽宗於潛邸挺挺持正爲上所重蔡京以
宮僚之舊每曲意事二人勦不少降節京嘗謂曰元
功遭遇在伯通右伯通旣相矣勦笑曰人各有志吾
豈爲利祿易哉京慙勦亦終不用以疾除顯謨閣學
士卒

李光

李光字泰發越州上虞人崇寧五年進士初知常熟
縣朱勦父冲倚勢暴橫光械治其家僮勦怒誠轉運
使移知吳江光不爲屈勦終不能害也歷知湖州徙

平江召拜禮部尚書卒孝宗賜謚莊簡廣西通志云
高宗時叅知政事秦檜以親黨鄭億年爲資政殿學
士光於榻前面折之又與檜詰難上前因數其弄權
誤國檜大怒明日光丐去中丞万俟卨論光陰懷怨
望責授建寧軍節度副使藤州安置越四年移瓊州
又移昌化論文考史怡然自適年踰八十以郊恩復
左朝奉大夫至江州卒

石公轍

石公轍字道叟新昌人紹聖二年以特奏狀元爲南

劍州教授紹興中遷知吳江初學宮在縣治西南厄於兵燹公轍至卽以東門外開江營舊址改建焉且置田以養士卽今學宮也邑人頌其德後通判平江府終大宗正今祀名宦

徐似道

徐似道字子淵天台人早負才名紹興中爲吳江尉受知范成大及爲秘書少監朝聞彈疏以舟載菖蒲數本書兩篋翩然引去道間爭望若神仙然

李衡

本正史叅郡縣志

李衡字彥平其先江都人徙崑山博學有局幹爲文操筆立就紹興十五年舉進士授吳江主簿部使者怙勢侵民衡不忍以敲朴迎合卽投劾去二十三年起爲仙居丞隆興初知溧陽縣爲治強敏專以誠意化民稅賦以期日榜縣門鄉無吏跡而取辦先他邑在官四年民未嘗犯重罪安撫汪澈等列上治狀召對殿中陳便民十事詔進一秩知溫州未行拜監察御史遇事敢言出知婺州以循良稱召爲司封郎中遷樞密院檢詳屢請老除秘閣修撰致仕孝宗思其

朴忠復起拜侍御史會有詔外戚張說以節度使僉
書樞密直學士周必大給事中莫濟不草制敕衡與
右正言王希呂上疏力諫謂不當以母后肺腑掌兵
柄廷爭移時遷衡起居郎不拜除知台州復力辭遂
致仕四人同時去國布衣莊冶作四賢詩以紀之衡
歸崑山圓明野墅日與門人講論經義娓娓忘倦聚
書踰萬卷名其室曰樂菴學者稱爲樂菴先生淳熙
五年卒年七十九所著有易論語說易義海及文集
柳楹

柳楹字安叟東海人乾道元年知吳江作松陵漁具
圖待制曾幾序之刻石尚存

趙廣

郡志作
公廣

字德儉宋宗室也淳熙四年知吳江重

建廟學取羨租以餼生徒凡郵亭使館橋梁祠宇皆
一新之以薦遷徐州同知

莫若冲 本盧志

莫若冲字子謙其先仁和人避地家崇德舉淳熙二
年進士爲湖州安吉尉常州教授知安吉政號平允

改知吳江撫字尤有聲歷司農丞知岳全三州以最
聞除大理丞

袁韶

袁韶字彥淳鄞人嘉泰中爲吳江丞時蘇師旦挾韓
侂胄威福撓役法提舉常平黃犖檄韶覆田定役師
旦密諭意吳江多姻黨幸相容當薦爲京朝官韶不
聽是歲更定戶籍承役者皆師旦姻黨師旦怒諷言
者將論韶犖急白於朝且薦之未幾師旦敗改知桐
廬嘉定末爲臨安尹十年道不拾遺紹定初拜叅知

政事浙西制置使仍治臨安卒贈太師越國公後許
景迂來丞吳江慕之作堂廳事之西題曰景袁云

張達明

張達明嘉泰中知吳江政平訟理有循良風作無訟
堂公暇從容與客論詩曰詩莫難於絕句絕句莫難
於五言欲其章短而意長辭約而理盡實難其才故
其畱題邑中者若松陵漁具諸作皆人所莫及後仕
至右丞

呂祖憲

松陽文獻

卷一

三

松陽文獻 卷十三
呂祖憲婺州人祖謙之弟嘉定五年知吳江重修學宮有記刻石

孫子秀

本張景人物志莫徐二表俱不載

孫子秀吳江主簿日詣學宮與諸生討論義理有妖人稱水仙太保郡守王遂將使治之莫敢行子秀往焚其廬碎其像沉其人於太湖曰副汝水仙之名矣妖遂絕

李椿

李椿維揚人紹定四年知吳江重建縣治四明袁肅

書琴堂二大字刻石椿自爲記石塘橋梁祠廟使館皆所修築後爲吏部侍郎

元

王柔

寶志作柔承

王柔字不剛大都人試安西王相府令史至元二十九年知吳江縣公勤廉謹屏除走隸專任信牌邨民晏然修官署學舍及三高祠設施咸有次第條理井然

哈刺哈孫

公

卷十三

七

哈刺哈孫大德九年同知吳江州事嘗語人曰牧民之官不忠勤何以盡職不公正何以聽訟不慈仁何以得民歲荒且疫為之流涕白州長留粟捄之曰寧拂上意以受責毋令民失所也秩滿州人立碑頌德唐棣莫徐二志俱不載

唐棣歸安人少從趙子昂學詩畫俱得其傳仕元為休寧縣尹遷吳江州知州有休寧稿味外稿見湖州府志

皇甫璧

皇甫璧字君寶東平人至大三年知吳江州不事智數政無矯飾待物一於誠始勉以文教申之以禁令人莫敢犯在州三載以廉能稱

高仁

高仁字壽之濟南人延祐三年知吳江州以大義開諭百姓諱健束手而怙終必刑歲役率先鉅室力稱事辦行省賑杭饑增州糶三萬石仁抗言州小數已溢不可增鹽運司課虧行省令仁詣浙西取盈於民仁言民貧不可妄動動且有外虞皆不能奪事竝寢

延祐二年經理田糧仁奉檄往丹陽金壇兩縣公田
舊額虛者七千仁曰朝廷豈利無田之租哉閱實悉
除之

張顯祖

張顯祖泰定元年爲吳江州判官重建長橋以石易
木爲竇六十有二每竇用鐵錮八長丈有三尺重四
觔仍布杪枋於水底以防傾圮功畢宴犒甚厚今列
名宦祠

段廷珍

段廷珍莫志作顧珍非至順三年爲吳江州判官決事如流
恤民如子見徐志

余謂兩州判固賢矣亦當時爲之長者委任有功
且不掩其美故能傳也嘗見元僧至仁有送徐景
善赴吳江州吏目詩首句云北麗橋邊鴻雁鳴三
高祠前秋水清今嘉興有北麗橋意景善卽嘉興
人而吏於吳江者味此二語期待不淺而邑志併
其姓字佚之以此知下僚散員湮滅無聞者多矣
爲之三嘆

千文傳

千文傳字壽道其先自汴徙崑山十歲能屬文用薦爲吳金壇兩縣教諭饒州慈湖書院山長延祐中登乙科進士同知昌國州州居海隅民頑犷往往羣行剽掠海中文傳柔以恩信俗爲之革遷長洲尹牒訴輻輳歲輸糧四十餘萬石文傳聽決趣辦具有條理徙榻公署未嘗輒出而親舊莫敢通謁會行助役法召縣民善諭之無敢爲詭寄者再徙烏程尋擢知婺源州朱文公遺業併於豪民子孫訴有司莫能直文

傳呼豪民折之以理悉歸之後至元六年改知吳江州以均徭賦爲先催科追逮信立程限民亦不違邨落之間不識吏胥治行爲諸州最至正三年召爲集賢待制與修宋史供職勤恪史成賜賚優渥遂請老以禮部尚書致仕優游里閭又十年卒文傳爲文雅正不事浮藻有仁里漫稿

那海

那海高昌氏以中書舍人提點資乘庫至正五年爲達魯花赤有惠政廣修水利今至正石塘其所築也

凡應祀廟墮罔不修飭

張居敬

張居敬洪武四年典史移建社稷壇於西門外山川壇於南門外莫旦云以此觀之則為政可知

廖欽

廖欽字敬先吉陽人

胡文穆志作新淦人

宋御史中丞剛之後

少強學明易詩與弟敬存俱有才名人稱廖氏雙明月珠洪武三年以薦至京試才學優等授河內丞邑小事煩又新附疲於供億欽至捐祿入以助民時年

尚少也知府王興宗宿望老成然嚴難事獨歎獎以為不可及清化鎮商稅多侵匿布政司捕及累年筦稅者事連數千家民洶洶竄太行山不能定遂以屬欽欽為區畫貧富相補不數日課足除民罪布政司大善之更置酒謝而去欽一以忠信導民八年考滿時方以蘇州為難治而吳江尤號劇縣乃命興宗知蘇州府而欽丞吳江興宗遇劇務輒以委之不得專治吳江也吳江有隄護田數千頃久為水所壞田不得耕勢家互相爭訟至聞於朝令官為修築責成甚

迫岸廢已數年高浚數十尺彌望水決無跡可求同僚皆失色以他事避去與宗謂使他人督之事必不集又煩朝廷乃大言曰宜莫如廖丞也欽欣然往會計工費召富民沈氏論曰隄成民享其利不成我受其禍於是私相戒當戮力告成毋累我公至期而隄成欽精敏絕倫吏抱文案叢雜手署口決頃刻而畢令簿拱手嘆服未嘗疾言遽色也使民皆不忍欺將去老稚遮道畱之頃之坐河內虧課錢三千餘爲守者所誣遂罰作鳳陽二縣之民間之皆來助役其居

者夜則焚香爲祈福或問欽何以能得人心如此曰吾不知也吾視百姓猶子耳久之釋歸杜門教諸子鄉里無賴者構蜚語誣欽兄弟俱下獄欽曰脫俱死如老親何我請坐之其弟不肯相讓於庭守者感動爲流涕於是弟得免而欽謫戍富峪數年以老病還嘗過河內民識之曰吾父也羅拜於前携酒殽相慰勞明日哀縑數百匹以爲贈欽固却之民請不已乃一夕逝去永樂元年以解縉薦詔同修太祖實錄旣至而書成上曰是老儒卽以爲翰林簡討同修文獻

大成二年卒年六十三子自勤爲蜀府紀善有名
解縉曰君壯遊南北聞見充拓詩歌清麗而時發其
雄奇屢考試貢舉川廣之士莫不謂君爲藻鑿權衡
也君孝友篤至天子初見問所經過卽以民疾苦告
天子嘗稱道之卒也遣醫勞問嘆息之而吾黨之士
皆痛惜之同官曾君日章王君汝玉梁君用行皆稱
爲豈弟君子哭之尤哀他日史官不傳之孝友必傳
之於循吏也

潘子曰余觀廖公之爲治雖古之循良何以加哉而
邑志至闕其名何濶略也嘗考王行半軒集有送吳
江廖丞序盛稱其賢輒爲之耿耿於心不能忘然猶
未究其實及得解學士所撰墓表及胡文穆志事跡
完備余得而詮次之然後無遺憾抑丞職固非卑也
自中世以降類多闕茸不稱卽有賢者亦爲資格所
困不得自見豈非其地勢使然哉

劉翰

劉翰陝西人洪武三十年主簿廉謹有爲以事調衛
輝府照磨

陳耘

陳耘福山人洪武三十一年主簿莅政廉平民信愛之後遷監察御史終紹興府知府

蔣奎

蔣奎南昌人舉聰明正直洪武三十年主吳江簿

盧王

二志皆同莫志云以主簿陞吳江尹徐志則直云主吳江簿皆非也建文二年遷吳江

知縣政號平允卒於官

陳敏

陳敏仁和人建文末主吳江簿明果而恕永樂六年

九月擢為刑科給事中十四年七月劾奏應城伯孫

巖擅殺千戶馬俊之罪命徙交趾自是貴戚斂手

按實錄敏以永樂六年被擢則任吳江當在建文

時郡志以為洪武末蓋因革除故諱之耳志書用

此例者甚多今改正

邢寬

邢寬北直隸人永樂十年知吳江撫字有方民銜其

惠後擢成都知府

李昇

李昇

李昇

李昇

松陽文獻 卷十四
李昇榆次人永樂中爲丞有美政十三年六月上言蘇松水患莫大於太湖欲洩太湖之水莫急於疏下流近時所疏河道歲久不免淤塞今觀常熟之白茅諸港崑山之千墩諸河長洲十八都港汶及吳縣無錫之近湖河道皆太湖之下流若循其故跡濬而浚之仍修蔡涇等閘候潮水來往以時啓閉庶免泛濫之患而民獲耕種之利從之

按實錄昇上疏在十三年六月而莫徐二志皆云永樂三年任則在事已十餘年矣豈國初久任法

行故安於其職如此耶然觀水利一疏則昇之美政可槩見矣

賈忠

賈忠字能誨冀州人永樂初以諸生守城功授寶鈔司提舉宣德中累遷知吳江縣忠有兼人之才處已廉明臨政勤恕八年秩滿赴京邑民千餘上章請畱命加從六品祿復任後忤當道同僚因誣執之忠不辨而退

按宣宗實錄宣德八年九月丙午復賈忠蘇州府

吳江縣知縣陞從六品祿忠任滿赴京其民千餘人奏乞畱之故加其祿俾復任今徐表列忠於永樂初誤也

葉錫

葉錫字玄圭永嘉人宣德中舉進士選庶吉士正統元年知吳江以廉謹聞未幾以母喪去四年復除吳縣專尚德化寒暑布袍十年詔大臣察舉天下監司郡邑長吏治行卓越者得十人其中知縣二人錫居一焉命賜宴於廷加章服楮幣紀功吏部時徐侍講

理曰玄圭爲治一本經術先律已而後齊人惟理之從法之守他無恤也官長承迎之私不行僚吏比周之情不接豪猾剋攘之姦不得行故雖淡得細民之心而忌者亦衆或軋之於上怵之於下傍玄圭堅不動至是而循良之效白焉人以爲知言十三年擢知寧國府

王懋本

王懋本金谿人由吏爲吳江丞以剩負召還民奏保其廉能乞畱之尋以憂去正統十年十二月民間其

服闋相率伏闕請擢爲知縣吏部言其以吏出身非例也上曰懋本既有去思吏何足計其從之第不爲例事見英宗實錄徐表列在景泰元年亦誤

劉彪

本英宗實錄叅郡志

劉彪湖廣人正統末以吏授吳江丞景泰六年滿三考巡撫副都御史鄒來學薦其處事公勤吏民懷慕乞晉秩畱任命遷知縣居官不携家累以廉幹稱

梁和

梁和字貴和其先泰和人徙應城舉賢良方正天順

四年爲吳江丞有廉惠

韓槃

本憲宗實錄

韓槃字簡英安陽人以御史調知吳江成化二年七月吏部奏府州縣官四十八人廉能公正撫字勤勞乞賜誥勅旌異槃與焉擢邳州知州時稱其端潔

陳堯弼

本莫氏續志

陳堯弼字秉均太和人貢士成化十七年知吳江明年錦衣衛千戶王臣同內侍下兩浙市珍寶威燄薰炙至吳江挽船夫役至數百人索千金闔邑動搖佐

貳皆走匿堯弼力與抗奮不顧身邑人亦皆鼓譟而出奪其器械遂斂避去時巡撫王恕在南京聞之卽具奏磔於市天下稱快繼有奉命取製衣梅者一梅費中金一兩民間梅樹悉懸紅牌邑人惶惑堯弼令伐樹以滅跡使者怒堯弼叱之曰君往浙江幹辦吳江非浙地也果有朝命當以公移下之豈有私懸牌以擾民萬一激變罪將安歸使者語塞而退尋以憂去後歷官辰州知府太僕寺丞

孫顯

本莫氏續志

孫顯字微之華州人成化二十一年由舉人知吳江廉介有爲嘗修縣志改知靖江

王鑑

王鑑字克明吳橋人弘治三年以監生主吳江簿守己廉潔常祿之外一介不取其弟自故鄉來鑑不悅卽遣歸太學生申顯知其無行貲也餽粟一斛已而弟卒鑑召申氏還之有馬役來謁循舊例獻白金一兩鑑怒擲庭下草中其人言公不受當見還奈何棄之鑑笑曰此吾過也命拾還之每公宴同僚皆衣錦

繡鑑獨衣麤布青袍殊無愧色人或規之曰君何自苦乃爾鑑歎曰吾見世之贖貨者多矣歸則隨手蕩盡惟畱醜聲於世耳且朝廷使我來此作官不使我作盜也言者愧服巡撫佾鍾奏旌異之在位九年滿去邑人爲作清官歌

金洪

金洪字惟淡鄞人舉進士知靖江縣弘治四年調吳江始至吏胥抱案牘請署以嘗洪洪陽不省唯唯書之吏以爲易與居三日請署如故洪怒曰若謂我不

事事耶摘三日所署出入隱竄者杖之吏股栗性明敏獄訟填委移時而決樽節用度歲裁去橫歛銀二十萬兩預積米至二十七萬餘石戶口增至一十二里是時豪猾縱橫賦役繁劇小民每占一役必破產捐軀洪歎曰虐政有甚此者乎乃抑勢家除奸吏廣分諸役以調劑之民感其德至有生子以金爲姓者上官爲請於朝頒其法行之一郡每六察按視獨吳江無訟怪問知府曰金令故善撫民也七年吳中大水邑人葉紳建言疏通水利命工部郎中徐貫等行

求水道開白茅港諸處吳江役夫一萬八千有奇適
嚴冬雨雪人憚遠涉皆惶駭洪請畱以通長橋水竇
疏太湖之水以入吳淞江至明年二月方受事人日
給米二升病者予藥遇風雨則少休親乘小舸往來
課督役成而民不告病他邑役夫十餘萬分濬白茅
以下饑寒死者甚衆九年遷試御史踰年爲真巡按
山東甚有聲正德元年擢知松江府坐減官布價米
劉瑾矯旨械洪至京不能害放歸

徐師曾曰稅長倚辦最爲繁劇然諸役竝受節制由
是奸宄得以威行於鄉閭洪寬其倚辦而裁其節制
民兩便焉又以餘力從邑士大夫飲酒賦詩以爲常
然性苛刻忤之者必墟其地而後已此則爲少短

郭郭

郭郭字于藩肥鄉人進士弘治八年知吳江

徐表在九年

廉潔無私公明有威典利革弊吏人膽落非宣召不
敢近前下至隸卒無所取索士民愛之十一年以憂

去後遷御史

劉澤

劉澤字濟民濟寧州人進士弘治十三年知吳江才識明敏斷決無倦一日偶出見瞽男女三人行乞疑之乃令捕其丐主李廣至而召瞽男顧來旺近案密問之來旺不覺號泣自言嘉定人為廣誘入舟用針刺其目令之乞食同行兩女子亦然又召問兩女子具得其實卽治廣罪遣三人歸一時皆異其事十八年召為給事中

張玄

張玄陝西人弘治中為典史以廉稱卒於官周恭肅

公用以詩哭之曰儀牀忍見舊氈青伐石誰書地下銘佳士祇應聊入幕好官何必盡明經荒祠稍稍題新字旅櫬行行見暮星此夜吳淞江上月獨畱清影照西廳公自註玄廉吏

徐欽

徐欽陝西人嘉靖初為主簿仁恕廉明凡刑罪人每至泣下邑中水旱齋戒祈禱多獲奇應民以菩薩呼之卒於官卽城隍廟西廡立像奉焉

張明道

本王志堅人物志

張明道字希程羅田人嘉靖八年進士授都察院都事謫滁州判官十三年擢知吳江政務大體不拘文法前令取常例於糧長丞以下效之糧長又轉科於民明道至手爲文以矢於神丞等皆失色未幾或以墨敗明道嘆曰神其不我欺耶縣當孔道使節旁午餽送皆資於民明道一切裁省雖失歡貴客不顧曰剝民求名吾甚耻之公宴治具皆取之坊長明道力行節儉減常費十之七民以訟至今自拘審非大故不公差鄉民至終歲不識隸卒或事連骨肉召至曲

爲剖諭必令感悔乃已未嘗輕抵於法嘗曰利與害相須吾幸居官食祿而復苟取若天道何雖所得奉錢多以充公用有一姬鬻孫以償官逋一孤兒以官逋被繫明道皆爲代輸解舍蕭然薪水時不給未嘗動念居期年遷刑部主事瀕行所攜止二敝籠後終按察副使徐師曾稱其持已修潔撫民慈祥國朝廉吏未有過於明道者也

喻時

本王世貞撰傳

喻時字中甫光州人嘉靖十八年以進士知吳江邑

中賦重吏素乾沒爲奸利時至則嚴勾校具得其狀始爲絜法提衡之秋夏稅以限上不事敲朴力役則應毋待號召鄉小民鬪鬪毋復之三老就公庭片語立決遣之各自得意去上臺下訊牒及他利害關白鑄一大櫃中手自封發吏不敢望得其一嘖笑而鄉小民亦不復知有吏時不爲操切間有所劾治皆取大猾尤者吏及大猾惴惴戴三尺而立然竟其任亡敗墨吏卽御史行部吳江亦不問吏及大猾主名曰令代我治之矣遠近稱曰喻青天竟用治行第一徵

拜御史前是太保王肅敏公廷相見其文而善之意不欲其外補時對曰我不外也誰當外者廷相奇其言而疑其不讐後乃心服後終南京戶部侍郎有集

王國光

王國光字汝觀陽城人進士嘉靖二十五年知吳江僅再期以憂去其爲政善因事以爲功適俗以成治有合於古之循吏嘗書禹之治水行所無事二語於座隅及其去也民謳思之起爲吏部主事歷官戶部邑中稅戶以輸輓至者皆垂寬恤萬曆初官至吏部

尚書

萬思謙

本南昌嘉定二志

萬思謙字益甫南昌人嘉靖二十六年進士授行人二十九年謫吳江丞署嘉定事遂為真政尚惇大不矜名炫才人莫窺其際嘉定多逋賦逃亡者眾田益荒嘆曰治此如烹鮮可更為擾乎且民有死耳賦終不可得償不如因而寬之且以招集亡者時稱其識大體三十二年夏倭薄東城乘風焚倉舍城幾陷叩頭籲天風反火滅賊酋連中矢石斃乃解而去以土

城難守議易以甃會遷刑部主事留以訖工明年城成賊果大至恃以無恐思謙遇事熟思若不能決不知者以為不快思謙聞而笑曰昔人云後人當思此憤憤殆謂我哉既去人果思之不置後思謙以久次轉光祿寺丞坐長揖冢宰外補累至福建左布政使家徒壁立遷南京太常寺卿致書張居正勸復言官切直忤指遂致事歸篋無遺帛清節天成士論歸之

楊芷

楊芷字文植德安人嘉靖三十二年知吳江倭分鈔

內地縣城庠薄四面阻水人無固志芷捐奉鳩工士民感其義爭出貲築之作堤於夾浦立堡於唐湖凡險磧要害竝以木柵鎖截造戰船大者爲中堅次爲左右翼小者爲游奕勾連相錯日頓兵江上廣斥候令民安意田作且耕且守流亡漸歸故用兵四年獨吳江資儲不匱初倭從崑山直抵青陽港芷以飛艦斷其上流復命兵快詐爲商船誘戰斬首十八級又戰於陳湖生禽二酋自是吳人始有鬪志後三月倭趨石湖芷獨乘小舟率兵出瓜涇港邀之湖水淺涸

倭列伍逆上芷以鈎攢搏之餘舟譟進斬首十六級馳入城明日賊逼城下不敢攻燒倉廩掠民財遂南下芷率兵躡之斬六級三十四年正月倭陷崇德大掠從南潯轉至梅堰兵備叅政任環率沙兵禦之敗績芷率奇兵張兩翼於六里之東西蕩中夾攻斬首十五級飛礮擊死者二十餘人倭尋夜遯四月復從嘉興至唐湖湖水洶涌芷引兵阻戰倭駭奔平望奪舟橫渡芷令善泅者鑿其舟而自屯兵盛墩斷其堤且布釘板於水底賊不敢渡又無所得食會宣慰

使彭蓋臣率兵二千來援我兵勢合與倭戰於平望蓋臣爲先鋒斬首百餘級轉鬪至楊家橋斬三十餘級蓋臣被創死我兵乘之生禽一賊斬首十八級於是將士知賊易破人人思奮皆以盛墩一捷爲之先聲故更其名曰勝墩云六月倭自杭州經爛溪抵平望芷督水兵與戰斬首三十六級生禽四人遂遁去芷雖久在兵間其所理民事皆中肯綮撫按交上其功累被獎賚然以不能俯仰遷南京戶部主事以去累遷南京兵部郎中

李遷梧

李遷梧字茂陽安丘人進士嘉靖三十八年知吳江四十年大水遷梧日夜拊循其人而部使者方以權算爲賢遷梧持不爲動曰民畢力以障水猶懼不給况忍驅之鬻妻子供租稅耶於是日閉閣宴坐不復問一事時具蔬果邀一學師共酌庭中寂無人鄉民至不復到縣卽上官有所督課則自却冠帶攜衣帽以往胥吏感其德亦不忍欺明年四月市人不戒於火延及公署一夕而燬方火作時遷梧坐門下戒僚

吏徙獄囚移帑藏歛圖籍無所散失未幾卽謀興復取材於垂圯之庾取力於鄉兵之隙取貲於失火之家而里出夫三日訟出錢數金以佐之上不費帑下不煩民越百日告成闕敞踰舊蓋遷梧在邑罹水火之厄各一而人不知有災後萬曆十五年邑復大水士民追思爲木主置城隍廟祀之知縣劉時俊至乃採公論祀之學宮距其去已四十年矣故老嘗言一御史按部至臥牀折足御史怒入縣治欲親刷庫藏至廳事後顧見東壁一小牀敝葛爲帷旁置竹筥二

無鎖鑰召左右詰之則遷梧臥具也乃淡媿嘆一無所問而去嘗與邑紳吳知府崑飲崑以一銀船注酒酒滿則帆張意頗喜之崑卽舉以爲贈遷梧受而日以供飲後任滿出境卽還之後有廉吏聞而嘆曰其後之却還不足言若初之直受非吾輩所能也

吳一本

吳一本字仲立沔陽人嘉靖四十一年以進士知吳江精於吏事夜翬翬注思不輟甫曙卽行之織悉有法度吳江賦浩穰總賦者類嘗以私盈縮其間甲賦

千乙賦百或千者得十九而百不能十一則匿其數而獨發其逋當事一切按程無所上下一本乃具格書所輸數計戶分給而總賦之書不得數易始至適大水之後人民離析部檄徵如常額一本以恩信勸諭民皆輸將恐後先是縣官交際間遺率資里甲里甲者貯丁田之羨以供諸費者也時詘則告病一本曰奈何以吾私故困民則悉籍丁田於官吳江水兵故稱雄而擾民亦甚一本曰巡司之有弓手以扞寇也而又益之水兵是倍費也則去弓手而代以水兵

無事散於諸司有急則聚之城以爲衛其所興革雖若煩碎然爲人強力行之裕如遷工部主事後官至山東參議暴卒不竟其用

李三省

李三省鄖陽人萬曆七年以歲貢主吳江簿九年遷崑山丞以一竹兜輿至食無肉牀無帷三年如一日有范某者以佛會煽惑男女嘗百餘人自號佛頭而誘少婦與私有孀婦聞而招之白日宣淫時知縣以公出三省得其實縛而撻之至死已卒於官二邑人

莫不憐之

其後以... 卒於官...

...

...

...

...

...

...

...

...

松陵文獻

獻集卷十五

邑人潘樗章力田撰

官師志三

明

劉時俊

劉時俊字恒甫富順人萬曆二十六年進士知廬江

改知桐城二十九年又徙吳江為人豁達精敏往催

科者率以盈為辦然黠者善負奸胥復陰與媾即匿

其賦可不輸一錢而馴者至有十限三分之輸時俊

一以八分有五爲程黠者無所自匿蓋實得戶部考成之數賦之入也溢於舊郡邑吏素表裏爲奸下檄督逋實飽私橐時俊覺之檄下卽并經承解上好遂阻漕卒獷悍橫索無厭時俊請漕撫約束每百石加四石凡概量之事率耆老爲政軍第持籌而已有浮圭合者扶以狗每倉設一門者按衛給籤驗而入毋多納一人曰吾不束軍而束民歲省米二萬石運塘歲苦圯時俊始甃以巨石延袤八十里費鉅萬而民間不知有役爲邑永利尤重教化表章節義賓禮耆

碩每望後一日角巾緩帶從容入學宮與諸生質疑問難竟日而罷月以爲常見訟牒有婦人名卽除之或婦人以事至戒伍伯離丈餘性公正不可干以私或以至情告輒色動常作續情說以導民厚焉久之事愈省訟愈減盜賊屏跡捕役患之遠結龍游盜夜半潛入城劫質庫計挫其威時俊聞之卽率吏卒臨視拘捕役家屬責以三日內必獲果如期獲悉以其贓歸質庫及賞諸捕他無所問會稅監陳增橫甚其黨教令檄蘇郡云昨歲金閫之變失上供物某某掠

某某匿凡五十三人皆吳江巨室知府錯愕不能應時俊駁之曰按檄事且經年昔不聞一言今驟發何也稅監固在徐入京之路乃來吳耶捕其黨置之法人皆爲時俊危時俊曰巨室邑命脉也一網五十三人邑空矣吾寧以身當之增見爰書語塞竟無以加時俊亦卒不言五十三人名以市德此尤其難者三十五年以治行最遷南京兵部主事選爲南京兵科給事中又二年出爲福建僉事以計典謫湖廣按察知事久之再遷南京尚寶司丞天啓元年引疾會蜀

師起以太僕少卿贊畫軍中坐蜚語被逮放歸後事白論平蜀功贈太僕寺卿溫璜紀事曰吳民健訟往往以人命求勝時俊每鞫問必召一二證者與約曰第許言一字不得言二字一字謂真與假也證者稍有游移卽重杖之故寃皆立雪而刁風稍息

馮任

馮任字重夫慈谿人萬曆三十五年進士知吳江邑多奸弊任悉意爬梳之得隱占田三百餘頃侵沒稅糧四千餘金其明年大水請蠲征發賑條救荒十二

便宜行之多所全濟然竟以催科缺額奪奉秩滿遷工部主事累進郎中出知成都府天啓元年遷陝西副使莊浪兵備三年轉叅政駐京州是冬有邊寇遣將李成功禦之斬獲甚衆明年春寇復大入親率師赴之三戰三捷俘斬數百尋以父病請告崇禎初補山東叅政武德兵備二年冬率師入援京師比至圍解以功遷廣東按察使而山東撫臣因皮島之變請畱爲登萊道許之累遷左布政天津兵備時景德間盜起鐵脛賊賈邦槐等尤橫輸輓幾斷任移鎮泊頭

四月焚其巢購得賊首斬之在天津二年上知其才密疏姓名於御屏七年遂擢副都御史巡撫山永築南北翼兩城進焚鹽屯俘斬頗衆展東勝城九百餘丈據其險阨九年敵兵入塞將反攻關門任遣將設伏於七家嶺以火攻之殺精銳三千餘人遂逡巡遁去明年築關西土城七十餘丈關東歡喜嶺敵臺一又傍牆立墩臺六先是撫山永者爲武陵楊嗣昌方當國兼本兵柄任在關修舉廢墜一切反其行事嗣昌聞之弗善也又議減關兵任具陳利害力爭得止

遂連疏引病不許十二年嗣昌密疏劾之坐免任在
關門三年適有天幸敵未嘗犯其境去未幾而代者
或殞或刑後遂議撤關以外棄之矣晚自號拙存居
士曰人皆以巧敗我獨以拙存後三年卒任居官勤
恪其在吳江值大水爲虐任斤斤守文而已不能行
度外之恩時譽遠出時俊下然於吏事亦無所廢云

霍維華

霍維華字應庚東光人萬曆四十一年進士知金壇
縣又三年調吳江甫至卽議興革大計以田賦莫重

於吳江計正賦若兵若役若徭若新增之餉蓋每畝
四斗有奇而耗不與焉且湖濱浮淤滄桑遞變等則
尤繁莫可究詰有腴而賦輕有瘠而賦重有無賦之
田有無田之賦每扼腕太息與邑中賢士大夫考究
源委維華有心計人不能欺周行阡陌暴露寒暑晝
則清丈夜則持籌肥磽廣狹瞭如指掌匿田隱賦纖
悉具出於是塌者蠲瘠者減而通計所贏均之合邑
向之所輸四斗者減一升五合有奇而分則三十八
者酌定爲九條列十有八議皆經久碩畫凡期年而

竣事計畝則百姓受減豁之利計糧則國家無絲毫之虧其所定履畝冊至今遵守不敢易焉他若催科兌運汰冗釐奸皆可爲後人法佐貳吏卒無所事事至懟恨無聊而士民望之如神明論者以比劉時俊稱曰劉霍四十六年入覲留部天啓元年授兵科給事中出爲陝西僉事四年復入刑科未幾驟遷至兵部尚書以附奄敗然其治邑之功固不可泯也

晏清

晏清字泰徵黃岡人萬曆四十七年進士知蕪湖天

啓元年調吳江蕪湖人爭之不能得性和易聽訟但求情實不尚威嚴事至立決請囑不行有二三大猾螫間左者清捕得杖之縱民環觀械繫而出衆共手擊之竟日而斃遠近快焉催科有序亦無逋者四年大水清角巾單舸出入洪濤間安輯遺黎與耆老講求丁亥戊申故事謂今昔異時請蠲請賑勢必不能惟漕運改折可稍救粟貴之苦爲白兩臺以去就爭遂以首災上聞得盡折歲額官所免加耗幾五萬石民所省加贈又不下四萬石而折價輕於市價亦不

下四萬金朝廷固以此爲不蠲之蠲不賑之賑而反
覆抗論得請者清之力也巡撫周起元發符買米縣
各數萬石他縣多僉富戶大爲民擾獨清知湖漚富
戶以子母貸商者召語以故給之符聽其買賣不旬
月而米至商民兩便明年擢禮部主事尋改吏部七
年以忤闈罷爲民崇禎改元復起吏部累進郎中十
六年遷廣東副使水利道後爲吏部尚書

熊開元

熊開元字玄年嘉魚人天啓五年進士知崇明縣俗

頑獷有白棒手數十輩橫甚前令以譁去署事主簿
復爲所擊開元設方略盡得其魁置之法而釋餘黨
不問一境帖然邑田土坍漲不常爲釐正稅額凡數
百頃以餘糧三千石請抵遼餉減編九百餘金崇禎
元年調吳江故事官署供帳悉出庫吏因得緣爲奸
利開元命悉出賣還官著令革諸進奉而慎擇筦庫
出納有程無敢犯法者以糧運南輕於北定爲例使
輕重相均勢家以軍儲請者一以故事裁之無所偏
徇所清覈隱田以萬計米以千計上臺稱其廉明先

是漕卒橫甚小不遂卽譁謀隨之卽前令劉公時俊等不能禁也開元密請上臺假便宜約束之嘗戴星唱籌質明畢兌所省耗餘十五故事行糧萬金縣官例有扣尅開元曰是致譁之端也如數畀之運弁來謁或請少示裁抑開元隆禮有加且致餽焉欽定鐵斛用椒實較驗類出民手開元斥民退令軍自較運卒皆大服嘗謂理民止當講求農桑水利間有婚姻田土細事一父老片言可決何嘗有大不平須廷鞫者徒爲人魚肉耳遂一意與民休息訟至立決無畱

者每歲終所入贖緩嘗不及積穀額開元曰吾不自病民肯爲人病民乎臺司事每下縣多所平反不輕擬贖雖忤意不恤也烏鎮界浙直之間湖州同知莅焉嘗以詞訟追捕至吳江民苦之開元具狀白其不便同知怒訶其蒞制開元曰同知卽尊至本轄臺司止矣諸臺司有所按問竝檄縣處分無徑行者今安得爾爲文告兩臺兩臺移牒浙省將合疏糾正其害始戢性明敏知人其所甄拔皆成名士旁邑賢雋聞風景附大半出其門下不獨吳江一邑也四年選爲

吏科給事中以考成舊案追論謫官久之稍遷光祿
監事行人司副十五年以面劾閣臣周延儒廷杖謫
戍後入閩中累遷隨征東閣大學士言事不合卽乞
身歸入山爲僧所著有魚山疏藁壬癸罪狀年譜諸
書

章日烱

章日烱字敬明德清人少孤育於伯父通政使嘉楨
卽以理學名節相摩切旣舉鄉薦五上不第賃居郡
郭授徒養母足跡罕至公府識與不識皆稱爲真孝

廉云崇禎四年署武進教諭却餽遺絕訴訟其所賞
識多知名之士七年舉進士知吳江會當定役富民
多飛灑求免按籍率畸零下戶乃矢神爲約閉諸胥
一室令盡疏諸大戶實產毋隱旣得其實則田多者
定役舊額千二百畝卽領北運爲倍增以寬其力而
更以南糧恤之有不肖紳受富民賂齟其間不聽
也收頭一役頗爲民病日烱曰潔已非難除害難耳
號設二櫃倣德清式可入不可出櫃置一吏一胥一
等一鑼俾納戶自兌投櫃中吏胥僅記其數一有勒

索卽鳴鑼以聞日烱時下堂親驗以杜羨端一縣稱便上臺善其法下所屬通行京邊轉輸奸吏多上下其手往往有征無解有批無收大都解有耗放有扣貪者先放後解罔顧公家之急且解屬之吏動委逝波不可問於是一切置存畱不發擇上供急者先之有事入郡則身致之以故課額早登爲七邑最時邑民虞燧上書言水利事下所司日烱卽銳意舉行下令長橋舊址爲民居旁蝕者期三日內悉撤之又疏九里塘之淤而水利漸復運塘自劉時俊之後歲久

多圯往來病涉至一夕溺死驛卒十餘人意惻然傷之設席後堂徧延耆老身自勸飲告以不得已之故皆踊躍助役迄用有成他如新學宮廣狴犴百廢具舉又師郡守寇公慎遺法置長卓五百以試士所取前列多相繼得雋者痛抑豪強有盜魁竄入一孝廉家立捕殺之遂爲孝廉所切齒九年夏陳婦事起松江士大夫閔然歸咎主者嗾御史疏糾而邑中不肖紳與孝廉又比而修前隙蜚語流傳日烱一無所辨惟力求去舟次胥江中暍而卒年五十有四其後達

州唐階泰代爲縣嘗痛其誣爲上書訟於兩臺識者
避之階泰字瞿瞿崇禎十年進士爲令亦有聲仕至
禮部員外亂後寓吳江卒

外孫樗章曰余髫髻時侍外大父於官署凡一言一
動未嘗不以古聖賢事相勗也而於官方政體則蒙
昧未能周知後得先考所著行實始心識其大都質
之通國之口亦默相符合也獨是陳婦之獄外大父
以此橫被口語而其原皆因公爲浙人又烏程相君
所取士輒從而排擠之豈知公志節皦然雖出烏程
之門固落落不相合哉陳婦旣以烈名詩謠幾徧吳
會而吾邑間巷之口頗有異辭吳先生允夏有紀實
一篇最爲詳覈今附錄之以俟論定云

一黨是為結躑今州繪之以對篇安云之獄分天
會而吾邑間巷之口敢有異轍吳吳主穴夏育殊實
之門固蒼蒼不昧合若刺棘以照各藉藉與所吳

葉翼雲

葉翼雲字載九同安人崇禎十三年進士知吳江初
至歲大旱蝗一以安靜鎮之緩征平糴捐奉設粥又
步禱於龍王祠日行數里布袍蔬食以金鼓為節拜
跪甚虔立法驅蝗分道力行未幾蝗皆墜河死是歲
雖災不害役有空田議者以國帑詘欲因畝加賦為
備翼雲條其不便所蠲省以六萬計暇則周行城郭
相度形勢乃延父老之賢者俾任其役令城外四周
皆康衢可通馳馬其上增築臺舍規制宏壯城內巷

各爲門門各有鍵啓閉以時嘗自我服閱兵郊外夜復率親卒巡行闔闔間謂其民曰吾以安爾寢便爾夙興也十七年夏北都變聞不軌者洶洶思亂翼雲廉得其主名立捕殺之一邑帖然咸服其勇決是年旱疫復作禱益虔不懈尋遷刑部主事乞歸閩中建國擢吏部稽勲司員外明年與紀文疇等起義兵守同安及惠安諸縣同安破被獲不屈死闔門遇害

潘子曰余少以文字受知於公公之歸也余餞之舟中時初聞揚州失守相顧欷歔慷慨不能自己余固知公之殉義決矣後四年果舉兵以死余旣不能執鞭弭以從公又不能徒步千里效尸鄉之哭尚何言哉然公在吳爲循吏在閩爲義士雖謂到今不死可也

潘子旣序次古今長吏論其行事又以爲教化者治民之本而長吏不能獨任故必立師儒之官以董正之其有益於治甚大宋元以前州縣鄉社皆立學爲之師者大抵明經有文行而邑志紀載闕如宋時獨有一楊瑛爲咸淳中教諭行業無聞然余考宋陳深

有送范竹所赴吳江學職詩又有贈吳江學掾詩今志皆無之則所軼多矣元時見於新舊志者十一人而陳祐則爲震澤學長立沈義甫祠者也考陳造送吳江陳學長詩有云舊學堪重漢儒席新文欲僕楚人騷又云垂虹高士知心客定信襟期出處同推許甚至豈卽祐耶抑別有其人耶謝起東則增立學之兩廊及繪聖賢像者也郭鄧則建靈星門顧儒寶則立教授題名碑者也盛輿則爲震澤教授以好古博識稱者也其他亦未見有卓然可紀者也明興尤重

教職之選常以得士多寡爲王者殿最菁莪樂育尤爲近古其後掄選不精往往視爲贅員以科貢頽暮者充之表不正而求景端得乎此子衿所以興佻達之刺也今斷自國初擇其一二可爲師表者著於篇

趙鈞

沈黻陶振俱以邑人署縣訓導事見文學傳

趙鈞大梁人吳元年爲訓導文章高古觀三高三忠兩祠碑記可見

瞿莊

邑志失

瞿莊字敬孚常熟人嘗爲吳江訓導有文名擢翰林

典籍與修洪武正韻累官禮部員外郎朱國禎云莊
自典籍遷禮部郎中後至參政

袁時億

袁時億東安人永樂十六年爲教諭有文學

丁侃

丁侃字秉和豐城人宣德二年爲教諭楊少師士奇

作詩送之造士有方尤長於詩古文選寧國教授卒

楊弼

楊弼字之夔廬陵人正統元年爲訓導楊士奇有送

姪子之夔吳江訓導詩

林彤

林彤正統五年訓導莫志云有學善書

陳賓

陳賓字廷用懷安人以儒士爲吳縣訓導正統十三
年遷吳江教諭訓士甚嚴累科得人多其高第又以
廟學隘陋謀之邑令市地於民鳩材庀工作禮殿兩
廡靈星門及講堂齋舍燕寢庖庫無不具備

劉文輝

劉文輝新昌人景泰五年為訓導端謹善教遷伊府紀善卒

陳用貞

陳用貞字善成東莞人天順二年訓導為人真率和易長於詩文有琴趣集遷長樂教諭致仕

梁矩

梁矩柘城人弘治中領鄉薦七年署學教諭為人嚴重廉潔諸生饋遺多却不受至不能自給訓導莆田方文敏有心疾遇長官輒詈辱之手搏生徒以為常

獨見矩端坐不言愛敬有加或私鉤取於人惟恐其

知也未幾被召

徐志云正德初被召乃本表弘治八年已有高志來代安得畱至正德初

耶再考之臨行邑中老幼奔送曰安得假公為吾父母乎

仕終臨洮知府

王維孝

王維孝字希舜貴州人嘉靖中以貢士

一云鄉薦

來署教

諭為人壯直廉潔人不敢犯惓惓以成就人才為務不營私橐諸生貧者必捐奉賑之擢知富陽縣後終監察御史

蔣弘憲

蔣弘憲宜興人萬曆三十一年以鄉薦署教諭申學規立社約又置田爲月課餼犒之資而教化大行有中官將與令爲難弘憲遲其將至集諸生逐之每朔望長吏至登堂考藝尉以下皆屏齋舍中不敢越級而上其風裁如此

解學臯

解學臯興化人崇禎八年以貢士爲訓導寬厚端潔人有求者多不忍却他日負之亦終不較也嘗言士

重立心學業顯晦皆從此出人以為薦論

陳國器

陳國器字玉汝武進人領鄉薦崇禎十年署教諭謹交遊絕訴訟黷舍蕭然而讀書夜分不倦人服其操

諸史惟馬遷書最有條理後人多失其意欲倣之作
明史記而友人吳炎所見略同遂與同事樾章分撰
本紀及諸志炎分撰世家列傳其年表曆法則屬諸
王錫闡流寇志則笠任之私家最難得者實錄樾章
鬻產購得之而崑山顧炎武江陰李遜之長洲陳濟
生皆熟於典故家多藏書竝出以相佐樾章長於考
核炎長於叙事互相討論間出其藁質之錢宗伯謙
益謙益大善之歎曰老夫耄矣不圖今日復見二君
絳雲樓餘燼尚在當悉以相付連舟載其書歸謙益

有實錄辨證樾章作國史考異頗加駁正數貽書往
復謙益不能奪也撰述數年其書旣成十之六七而
南海莊氏史獄起叅閱有樾章及炎名俱及於難莊
氏書以故閣臣朱國禎史槩爲粉本自與苕士共足
成之刻成兩人未嘗寓目徒以名重爲所撫引遂罹
慘禍天下旣惜兩人之才更痛其書之不就并已就
者亦不傳也樾章被逮神色揚揚如平時在獄賦詩
不輟癸卯六月死於杭年三十八妻沈氏中書自炳
之女隨坐北徙以有身不卽死齋藥自隨旣免身至

廣寧所生子又死卽日飲藥自殺程章秀眉廣額目
光炯炯射人論事鬚髯戟張事親孝與人忠疾惡如
讐赴義若渴所著自史藁外有今樂府國史考異松
陵文獻杜詩博議星名考壬林韭溪集凡若干卷

後序

亡兄撰此書凡數易藁而就旣沒藁本流傳人間爭
相珍秘康熙甲子或言於邑令請改脩縣志三月而
遽成乙丑春耒歸自都門有言新志全用亡兄之書
者索而觀之信然因愾然歎息謂吾兄作書固爲邑
志張本吾不怪其蹈襲但不應畧不載吾兄姓名絕
不言本某書有似取人之物而諱言主名者其人不
服更出書數百言大畧謂紀載之書必有所本馬遷
班固無不仍襲前書者夫子長史記明言據左氏國

語采世本戰國策述楚漢春秋孟堅漢書特爲馬遷
立傳不聞舉其人與書而沒之也又謂亡兄以事見
法不當道其姓名孟堅不死獄乎蔚宗不赤族乎前
後漢書至今行世未聞當時人掩取之也亡兄爲人
所株連非以自著書得禍爲親知者得其著述宜何
如表章稱道顧利其死而掩取其書有人心者當如
是乎且文獻中固嘗爲其祖若父作傳矣爲子孫者
忍遂反脣相詆乎出險語以箝人口此訟師刀筆之
事而謂衣冠爲之乎旣乃嫁過於朱先生鶴齡謂朱

實襲潘之書已乃襲朱初不襲潘夫朱先生與亡兄
交最厚其自著書頗多何至掩取亡兄之書縱有所
援引亦明言本諸潘氏凡考訂論贊皆言潘某云云
新志何所見而悉以潘之說爲朱之說非唯掩潘抑
且誣朱矣世衰俗薄朋友道喪已則不義又從而爲
之辭直道在人余亦不復置辨第點檢亡兄之書梓
以行世莊註具存何傷乎向秀化書無恙何損乎景
升惟是出之不早有此紛紜是余之罪也夫

語采世本戰國策述楚漢春秋孟堅漢書特爲馬遷
立傳不聞舉其人與書而沒之也又謂亡兄以事見
法不當道其姓名孟堅不死獄乎蔚宗不赤族乎前
後漢書至今行世未聞當時人掩取之也亡兄爲人
所株連非以自著書得禍爲親知者得其著述宜何
如表章稱道顧利其死而掩取其書有人心者當如
是乎且文獻中固嘗爲其祖若父作傳矣爲子孫者
忍遂反脣相詆乎出險語以箝人口此訟師刀筆之
事而謂衣冠爲之乎旣乃嫁過於朱先生鶴齡謂朱

實襲潘之書已乃襲朱初不襲潘夫朱先生與亡兄
交最厚其自著書頗多何至掩取亡兄之書縱有所
援引亦明言本諸潘氏凡考訂論贊皆言潘某云云
新志何所見而悉以潘之說爲朱之說非唯掩潘抑
且誣朱矣世衰俗薄朋友道喪已則不義又從而爲
之辭直道在人余亦不復置辨第點檢亡兄之書梓
以行世莊註具存何傷乎向秀化書無恙何損乎景
升惟是出之不早有此紛紜是余之罪也夫

松陰文庫
藏書

松陰文庫
藏書



